



Meeqqanik kinguaassiuutitigut atornerluinerup annikillisarnissaa siunertaralugu meeqqanik kinguaassiuutitigut atornerluisartut sakkortunerusumik pineqaatissinneqartarnissaat aammalu meeqqanik kinguaassiuutitigut atornerluisartut pinngitsaaliissummik nakorsarneqartarnissaat annertunerusumik ukkatarineqassanersut apeqquteqaat aallaavigalugu oqallinnissamik siunnersuut.
(Inatsisartunut ilaasortaqaq Bo Martinsen, Demokraatit)

Demokraatit Inatsisartunut ilaasortaataata Bo Martinsen-ip oqallinnermut matumunnga pingaarutilimmut aallarniineranut qujanaq.

Siullermik erseqqilluinnassaaq: Demokraatit eqqugaasut tapersersorpaat. Meeqqat tapersersorpagut. Meeqqat illersussallugit politikertut siullertut, piumasaqaatitaqanngitsumillu pingaarnerpaatut suliasaarput. Suliat tamarmik, eqqartuussivitsigut pillaanerit tamarmik, ikiorsiinerillu tamarmik ataasiinnarmik tunngaveqartumik naliliiffiqineqartariaqarput: Meeqqanut toqqissisimanarnerulersitsippat?

Imaappoq, inunnt meeqqanik kinguaassiuutitigut atornerluisimasunut imaluunniit meeqqanik kinguaassiuutitigut atornerluinissamut annertuumik ilimanaateqartutut nalilerneqarsimasunut aalajangiusimanerusariaqartugut. Pillaatissiissut, pineqaatissiissullu iliuuserisimasamut naapertuutissapput, innarleeqqinnissamullu periarfissat sapinngisamik annikillisinneqassallutik. Pinaveersaartitsinissaaq, meeqqallu illersorneqarnissaannut sakkussat inatsisinik unioqqutitsinngitsut atorneqarnissaat Demokraatinut pingaaruteqarpoq, matumani utersaarnissaaq pinngitsoortinniarlugu pinerluuteqarsimasunik ulorianarnerpaanik sivisunerusumik isertitsivimmiisitsisarnissaaq, misiligummik iperagaanissamut piumasaqaatit sakkortunerusut, iperagaanermilu siunnerfilimmik immikkut tapersersuineq ilanngullugit.

Ilutigisaanik katsorsaaneq eqqarsaatigalugu uppiavallaassanngilagut. Siunnerfilimmik, nakorsaatinillu katsorsaaneq atoqateqarusussusermut pinerluuteqarsimasut ilaannut annikillisaataasinnaasarpoq, iliuuserisimasallu uteqqeratarsinnaanerit annikillisaataasinnaasarluni. Atoqateqarusussuseqarneq annikillisillugu nakorsaaq, inunnt atornerluinissamut annertuumik ilimanaateqartunut katsorsaanerit ilaliullugu nunarpaalunniit atorneqarpoq. Taamatut katsorsaariaaseq, pingaartumik atornerlueqqinnissamut annertuumik ilimanaateqartutut nalilerneqartunik iperaanermi piumasaqaatit sakkussatsinnut ilanngunneqarsinnaanersoq, qanorlu ilanngunneqarsinnaanersoq pimoorullugu misissorneqartariaqartoq isumaqarpugut. Katsorsaaneq taamak ittoq atorneqarpat, inatsisitigut ersarissunik isumannaallisaaffiqineqarnikkut, iluaqutaaneranillu aamma isumannaatsuuneranik ataavartumik nakkutilliinikkut nakorsat nakkutilliinerisigut pissaq.

Taassumap saniatigut pinerluuteqartunik siunissami ungasinnerusumi sulii ulorianartussatut nalilerneqartunik sivisunerusumik isertitsivimmiisitsisinnanissaaq,



DEMOKRAATIT

nammineersinnaajunnaarsitsisinnanissarlu periarfissaasariaqarpoq. Atornerlueqqueratarsinnaaneq annertutillugu, meeqqat aarlernartorsiunnginnissaat inuiaqatigiit salliuttariaqarpaat. Sakkortuumik eqqartuussivilersuussereernikkut aatsaat tigumminittoqartassaaq, kisiannili ataavartumik ulorianartunut piviusorsiorpalaartumik, atorsinnaasumillu sakkussaassalluni.

Pinaveersaartitsineq assut annertusarneqassaaq. Imaappoq, siusissumik misissueqqissaarnikkut paasiniaanernut, inuit atoqateqarnikkut ulorianartumik perusussuseqartut atornerluitinnagit neqeroorutitut, paquminartoq paquminarunnaarsillugu aamma amerlanerusut ikiorneqarnissaminnik noqqaasilersillugit kinaassutsimik isertuussilluni ikiuinissamut neqeroorutitut, ussassaarutinullu atoruminartunut isumalluuteqartitsineruneq. Atornerluinerit pillugit politiit misissoqqissaarinissamut, suliallu uppersarnissaanut piginnaasaat aamma annertusassavagut, suliallu taamak ittut eqqartuussiveqarfiup sukkasuumik, eqqugaasunullu ataqqinnittumik suliarinnissinnaanissaa qulakkeerlugu.

Inuit attuumassuteqartumik eqqartuunneqarsimasut meeqqanik sullissinissaannut imaluunniit nammineq kajumissutsimik sulissinissaannut siunnerfilimmik inerteqquteqarnerit eqqunneqassapput. Ilutigisaanik iperagaasut avatangiisinut ulorianartunut uteqqinnginnissaat pillugu pinerluttunik isumaginnittoqarfiup, psykiatriip, isumaginninnermilu oqartussat akornanni qanimut suleqatigiittoqarnerusariaqarpoq.

Aalajangiinerni tamani eqqugaasut, taakkualu ilaqutaat pingartinneqartassapput. Eqqugaasunik tapersersuinerit isumalluutit amerlanerusut, aningaasatigit taarsiinerit, tarnip pissusiinik ilisimasalimmit ikiorserneqarnerit, inatsisitigullu isumannaallisaaffigineqarluni ilitserorneqarneq pisariaqarput. Pineqaatissiissutit sakkortunerusut pineqartillugit, nalunaarutiginninnermit suliap naammassineqarnissaata tungaanut, ingerlariaqqinnermilu eqqugaasut tapersersorneqarnissaannut systemip nukittuup ilutigisaanik tamanna piuaannassaaq.

Inatsisitigit isumannaallisaaffigineqarneq ataqqillugu aalajangeriataallaqqittariaqarpuq. Pinngitsaaliissuumik pineqaatissiissutinik annertusaanerit imaluunniit nakorsaattortitsinerit suulluunniit misillitlarneqarsimassapput, suliatigit paasisimasanik tunngaveqassapput, inatsisitigullu ersarissunik qularnaveeqquteqassallutik. Kisianni aamma meeqqat kinguaassiuutitigit atornerlunneqarnissaannut annaassisinnaasunik sakkussanik atuinissatsinnut akerleriissuteqarnissamut ernumaneq akimmiffiutissanngilarput.

Inaarutaasumik Demokraatit erseqqissaatigissavaat, sakkortunerusumik pineqaatissiisarnissaaq, katsorsaanerusarnissarlu pillugu oqaloqatigiinneq inunnik ajattuinnissamik kissaataanngimmat. Meeqqat aarlerinartorsiunnginnissaat, toqqissisimanissaallu siullinneqartuaannarnissaanik ersarissuumik pingaarnersiuinissamik kissaataavoq. Pitsaasunik, inatsisitigullu isumannaallisaaffigineqarlutik suliniutit atuutsilernissaannut, matumani atornerluinissamut annertuumik ilimanaateqartunut nakorsaattortitsinissamut, pinerluuteqarsimasunik ulorianarnerpaanik sakkortunerusumik pineqaatissiinissamut aamma pinaveersaartitsinerit, eqqugaasunullu suliniutit annertuumik nukittorsarnissat ilanngullugit, periarfissanik piaartumik qulaajaasussamik, peqqissaarullugu suliamik



aallartitsisoqassasoq kaammattuutigaarput. Eqqugaasut salliutissallugit, inuiaqatigiillu meeqqanut toqqissisimanarnerulersitsinissaanik eqqartuineq ersarissunik, iliuuseqarusussusermillu siunnersuutinik kinguneqassaaq.

Taakkuupput oqallinnermut Demokraatit maannamut isummersuutigerusutaat.